

**REGIONAL NEWS BULLETIN
HEADLINES (EVENING)**

Date – 17/01/2025

Time - 18:30 Hrs

1. Governor Gen Rtd Dr. Vijay Kumar Singh chu sorkar laipui hnuai Mizorama hmalakna thenkhat hrilhfhah a ni.
2. Chief Minister Pu Lalduhoman hmunphiah lei kawngah an inrempui te bakah midang leithei turin kawng an hawn tur thu a sawi.
3. Prime Minister Narendra Modia chuan vawiin khan New Dehli-ah Bharat Mobility Global Expo a hawng.
4. President Draupadi Murmui chuan vawiin khan New Delhi-a Rashtrapati Bhavan-ah ramchhung infiammite chawimawina National Sports Awards 2024 sem.

<><><>

GOVERNOR

Governor Gen (Dr) VK Singh-a chu Project Pushpak Chief Engineer Pu Girish Prasad Singh an vawiin khan Raj Bhavan-ah hmuin Mizoram chhunga Border Road Organisation (BRO) hnuai hmalakna leh hmachhawpte a hrilhfhah a. He meeting hi Mizoram hmun kilkhawr leh pawimawh tak takte thleng thei tura tun dinhmuna BRO kaltlanga kawngpui leh lei dawh mek thlen chinte inhrilhhrinatna atana duan a ni.

Governor chuan Mizoram ang tlangram chheng chhe takah technology thar ber berte chhawr tangkai chunga hun leh senso tlem zawka inkalpawhna tha zawk siam tum turin Project Pushpak te a chah a. An project-te a hun taka zawhfel a nih theih nana harstana awmte a ranglama chinfel dan ngaihtuah zel turin a chah bawk.

SIB Mizoram hotu Pu Rohan Botre pawhin Governor hi hmuin venhimna chungchang leh a kaihhnawih pawimawhte an sawidun a ni.

Hemi hnu hian Ministry of MSME hnuai an hmalakna te Pu Samrat M. Jha, Asst. Director Gr-I & Head of Office chuan hrilhin Public Procurement Policy 2012 awmze nei zawka kalpui a nih theih nana ni 2 awn tur CPSE level Vendor Development Program, January ni 28-29 chhunga Vanapa Hall, Aizawla neih tur chungchang a sawipui a ni.

<><><>

NATIONAL GAMES 2025

Ramchhunga infiamna khawmpui lian ber, 38th National Games, 2025, chu January ni 28 atanga February ni 14 chhung khian Uttrakhand ah neih tur a ni a, inbuatsaihna ngawrh taka kalpui mek a ni a, Mizoram atangin Sports discipline 14 chu National Games khel turin an tling a, infiammi 81 an tel thei tura ngaih a ni.

National Games-a Mizoram aiawha tel tur Sports Association hrang hranga coach te chu Mizoram Olympic Association chuan vawiin khan Sports & Youth Services Conference Hall ah a kokhawm a, National Games inbuatsaihna hrang hrang sawiho a ni.

National Games 2025, Uttrakhand a neih turah hian Dehradun khawpuiah infiamna tam zawk chu nghah a ni dawn a. Infiamna hrang hrang 34 hmanga inelna neih tur a ni a, Mizo infiammi langsar zingah Lalremsiami Hockey player chu Mizoram atanga tel thei tur langsar zingah a tel a. Medal beisei awm zingah Nazareth Lathazuala, Wushu, Taekwondo poomse mipa team leh Lalthlamuanpuia, Weightlifting ah Lalchhanhimi te chu medal hlawhchhuak thei tur zingah beisei an ni.

Mizoram atanga National Games tel thei tur Sports discipline te hi - Wrestling, Football, Weightlifting, Wushu, Boxing, Cycling, Aquatic, Hockey, Judo, Archery leh Taekwondo te an ni a, Wild card hmanga tel thei turte hi - Swimming, Shooting leh Athletics te an ni. Kum 2025 National Games hi Mizoram atanga national games tling thei an tam ber tum a ni.

<><><>

ZPM

Chief Minister Pu Lalduhoman Mizoram Hmunphiah King Industries te siam chhuah phai lama thawn tur vawiin khan a vai liam. Pu Lalduhoma chuan thusawiin Hmunphiah chu sawrkar in thlai thar lei tur a tih zinga tel a ni a, a lei turin mi 7 inremna an siampui a, inremna an siam puite hian sawrkar hmunhma leh hmanrua te an hman an

phalsak dawn ani a ti a. Anni bakah hian midang lei duh an awm pawhin sawrkar chuan a phal vek a, inelna thianghlim tak awm se an duh a ni, a ti.

Wawiina Aizawl South II biala a tlawhnaah Pu Lalduhoma chuan nikumah Hmunphiah bika agreement an ziahpui company in a ti mualpho hle a, kuminah erawh empanelled firm 7 te nen inremna siamin Hmunphiah ro hi an lei zo vek thei lo a nih chuan sorkarin a lei ang a ti a ni. Sorkar hmunphiah leite hmangin Home hrang hranga awm thalaite hnathawh tur an siam sak dawn niin a sawi.

King Industries CEO Pu Laldinliana chuan Kum 2021 atang khan Mizoram Hmunphiah chu state pawnah an supply tan tih a sawi a, kum 2021 ah kg ah Rs. 115 in Grade A an lei a, Kum 2022 ah kg ah Rs 140 in an lei a ti a, nikum khan hmunphiah hi kg nuai 3 vel an la khawm a, a sawngbawl hna hnamdangin an tih thin pawh Mizo thalai te training pe in, an khawih ve thei tawh a ni a ti.

King Industries hian hmunphiah hi state pawnah tum 5 an thawn tawh a. Howrah West Bengal ah vawi 2, Patna – Bihar ah vawi 2 leh Guwahati ah vawi khat an thawn a ni.

<><><>

NIT TOUR

Aizawla Assam Rifles Middle School naupang 10 te chu National Integration Tour nei turin vawiin khan Assam Rifles DIG Brigadier Girish Upadhay an a vai liam.

Brigadier Girish Upadhay chuan NIT Tour-a kal tur naupangte chu an thil tih engkima thawk rim turin a fuih a, tour an neihna atanga thil zir chhuah nei turin a chah bawk a, Zirlaite hian Guwahati leh Shillong an tlawh dawn a ni.

Hetihlai hian Mizoram Sorkar-in Assam Rifles sawn chhuah tum chuan a nghawng hle dawn tih sipai enkawl na hnuai school naupang chungte zinga mi Ramhmingliani Hmar chuan a sawi a, heng sipai enkawl school-ah hian hnam hrang hrang an awm avangin naupangte tan an zirlai piah lamah hnam dang tawng leh nih phung an zir chhuah thin thu sawiin, zirlai naupang tam zawk hi Below Poverty Line hnuai awm an nih avangin heng school-te hi an tan a tangkai thu leh Assam Rifle sawn chhuah an nih tur chu pawh an ti takzet thu an sawi bawk.

<><><>

MNF

MNF National Core Committee Member Pu Tawnluian ZPM sorkar chu unaute thlavang hauh ngam lovah puhin India lakah meikhupin a awm mek a ni a ti. Wawiina Mizo Hnam Run-a thu a sawinaah Pu Tawnluia chuan tunhnaiah Bawm unau nunau nena Mizoram rawn lut tawh 28 chu Mizoram sorkar leh Assam Rifle ten an nawr let leh a, unaute thlavang hauh inti ve siin a tak takin engmah an ti tak tak ngam lo a, Chief Minister ber pawhin central thuneihna do ngawt chi a ni lo, a ti a ni a ti.

Pu Tawnluia chuan, ZPM Sorkar chu sum enkawl thiam loh avanga sum leh pai dinhmun ti khawlo ah puhin tuna an dinhmun chu BJP Minister pek nge Zu zawrh, tih a ni deuh maiin a lang a ti a, Sum an puk awk awk thin te, oil man an tih san te, buhfai man nasa taka an tih pun te, chhiah an tih pun te eng atan nge an hman tih an hre duh tih a sawi bawk a ni.

<><><>

BJP MIZORAM

BJP Mizoram State President Pu Vanlalhmuaka chuan Mizoram mipui ten khawtlang tana malsawmna an dawnna kailawn tur a nih avang leh Central Scheme tam tak Local Level hruaitu ten kalpui a ngaihna chin a awm avangin VC/LC inthlan atan a tam thei ang ber chuh turin hma an la dawn a ti.

Pu Vanlalhmuaka chuan, "Inthlan lo awm tur hi Mizoram a Sorkarna chelh mek tute tan fiahna hun a nih theihna a awm tih sawiin Mizoram mipuite hian Party Politics an ruihchilh thin avangin Vote an thlak pawh hian an Vote chhan an hre tam lo hle a, Political Party te'n inthlan hmaa thu an tiamte an chhut nawn tawh ngai lova, hei vang hian a state pum huap anga hmasawn a har phah hle a ni a ti a ni.

Pu Vanlalhmuaka chuan Lengpui Airport chungchang sawiin, MNF Sorkar lai khan indawrna ngun taka neih a, AAI leh Mizoram Sorkar tan pawha insiam rem ngai tam tak ngun taka ngaihtuah tur a awm a, nimahsela tun tuma Sorkar mek hian MNF-in Airport hralh an tum tiin Mizo Thalaite leh mipuite thluak an suk sak a, chuvangin MNF Sorkar khan hma an la zui thei ta lo niin a lang a, vawiin ah erawh chuan Lengpui Airport hralh tuma puh tuten Mizoram Sorkarin Lengpui Airport enkawl loh dan an dap ve leh a ngai ta tho niin a lang a, heng atang hian Mizorama Politician-te hian eng Politics nge an khelh a, tute ngekan khelh tih a chiang hlein a lang a ti.

<><><>

MPCC

Mizoram Pradesh Congress Committee President Pu Lal Thanzara'n ZPM sorkar chuan Nikum January leh December inkar khan cheng vaibelchhe 3393 a puk tawh a ti.

Vawiina MPCC Political Session Congress Bhavan-a an neihah thu sawiin Pu Lal Thanzara chuan cheng vaibelchhe sang thum chuang ba nei chungin mipui laka an tiam sawhthing lei te, banakaih te an puitlin theih dan tur an thlir mek a ni a ti a, Zo khua kuthnathawktu ten an lo ring tawh si a, anmahnia inghatin sawhthing mi tam takin an ching a, an han thar mah anga hetiang leiba nei chung hian an lei thei a nih chuan zokhua kuthnathawktute an lawmpuiawm takzet ang a, Kuthnathawkutte hmakhua ngaihtuah hian leithei ngei se an duhsak a ni, a ti.

Pu Lalthanzara chuan Mizoram politics ah thil tam tak a awm lem lo a, ruling te chet that leh chetchhiatin a hril kawp zel a ni a ti a. Vawiina ruling te hi an chet that vak an ring lo, BJP pawisa an hmang a, an BJP tak tak ngam si lova, an BJP tak tak ngam hun rual rualin an chhiatna hun a thleng dawn a, a chhan chu missionary te talhfiak nen chanchintha hrilna kawnga harsatna siamsak hi Mizo mipui zawng zawngin na an ti a ni, a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar hi puan leh a ni ang.

<><><>

PM

Prime Minister Narendra Modia chuan vawiin khan New Dehli-ah Bharat Mobility Global Expo a hawng. Thusawiin PM Modia chuan veivahna kawnga sumdawna huangzauh nan ramchhungah theihna tam tak a awm tih a sawi a. Sawrkarin green technology leh Make In India hmalakna atan theihtawp a chhuah tih sawiini India rama automobile sector chuan tunhnaia nasa takin hma a sawn a ti a.He hmasawna hi mipuite thlawpna tha tak vang a ni a ti bawk.

PM Modia chuan Green technology, Electric Vehicle, Hydrogen Fuel leh Biofuel te tihmasawn turin tan a la a ti a. Lirthei lama sumdawng duhte tan ram chhungah kawng tam tak a inhawng tih a sawi bawk a ni.

<><><>

SPORTS AWARD

President Draupadi Murmui chuan vawiin khan New Delhi-a Rashtrapati Bhavan-ah ramchhung infiammite chawimawina National Sports Awards 2024 sem. Vawiina chawimawina hlan zingah hian World Chess Champion D. Gukesh, Paris Olympic medal pahnih latu Manu Bhaker, Men's Hockey Team Captain Harmanpreet Singh, leh Paris Parlympic-a gold medalist Paralympics Praveen Kumar Major Dhyan Chand Khel Ratna Award pek an ni a. Kum li kalta chhunga infiamna lama hmingthate hnenah chawimawina hi pek a ni a. Heng zingah hian Para-Shooting coach Subhash Rana, Shooting coach Deepali Deshpande, Hockey coach Sandeep Sangwan, Badminton coach S Muralidharan leh Football coach Armando Agnelo Colaco te chu Dronacharya Award pek an ni a. Infiammi 32 hnenah Arjuna Award pek a ni bawk a ni.

<><><>

PM MANN KI BAAT

Prime Minister Narendra Modi chuan tun thla ni 19 Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 118-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>